



REPUBLIKA E SHQIPËRISË
KOMISIONI QENDROR I ZGJEDHJEVE
KOMISIONERI SHTETËROR I ZGJEDHJEVE

Data: 14.02.2025

Nr: 95

Ora: 12:00

VENDIM

PËR

**SHQYRTIMIN ADMINISTRATIV BAZUAR NË DENONCIMIN ME NR. 3 ID,
DATË 03.02.2025, TË REGJISTRIT TË DENONCIMEVE, TË ORGANIZATËS
QENDRA “QËNDRESA QYTETARE”**

Sot më datë 14.02.2025, Komisioneri Shtetëror i Zgjedhjeve, mori në shqyrtim çështjen administrative me:

KËRKUES: Organizata Qendra “Qëndresa Qytetare”

SUBJEKT: Drejtori i Shërbimit Spitalor, Tepelenë
Drejtori i Njësisë Vendore të Kujdesit Shëndetësor, Kolonjë
Drejtori i Njësisë Vendore të Kujdesit Shëndetësor, Durrës
Drejtori i Spitalit Bashkiak Tropojë
Drejtori i Spitalit Bashkiak Delvinë
Drejtori i Spitalit Bashkiak Pukë
Drejtori i Spitalit Bashkiak Kolonjë
Drejtori i Qendrës Shëndetësore Paskuqan
Drejtori i Qendrës Shëndetësore Bregu Lumit

OBJEKT: Konstatimi i përdorimit të burimeve publike

BAZA LIGJORE: Neni 19, pika 1, shkronjat “dh”, “f”, “n” dhe pika 2, neni 91, pika 4 të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar, vendimi nr. 9, datë 24.12.2020, të Komisionit Rregullator, të ndryshuar

Në përfundim të këtij shqyrtimi,

Nr: 95

Data: 14.02.2025

Ora: 12:00



“Për shqyrtimin administrativ, bazuar në denoncimin me nr. 3, datë 03.02.2025, të regjistrit të denoncimeve, të Organizatës Qendra “Qëndresa Qytetare”

KONSTATOJ:

Organizata Qendra “Qëndresa Qytetare”, më datë 03.02.2025, ka paraqitur në Komisionin Qendror të Zgjedhjeve (KQZ) nëpërmjet adresës së postës elektronike e-mail, denoncimin e administruar në regjistrin e denoncimeve me nr. 3 ID.

Në këtë denoncim Organizata Qendra “Qëndresa Qytetare” parashtron sa vijon:

“Faqet zyrtare të institucioneve të kujdesit shëndetësor, duke përfshirë drejtoritë e shërbimit spitalor, njësitë vendore të kujdesit shëndetësor, spitalet bashkiake dhe qendrat shëndetësore, janë angazhuar me shpërndarjen e postimeve që janë tërësisht me përmbajtje politike”.

Me vendimin nr. 65, datë 05.02.2025, të Komisionerit Shtetëror të Zgjedhjeve (KSHZ), u vendos fillimi i procedurës administrative, për shqyrtimin e këtij denoncimi. Bazuar në këtë vendim i’u kërkua personave përgjegjës për raportimin e veprimtarive publike, të Institucioneve subjekt i këtij denoncimi që të paraqesin prapësimet në lidhje me çështjen objekt hetimi.

KQZ administroi pretendimet e Titullarëve të Institucioneve subjekt denoncimi, të cilët në tërësi deklaruan se veprimet nuk kanë qenë të qëllimshme. Situatat janë krijuar nga gabime njerëzore dhe jo veprime me qëllim për favorizimin e subjekteve zgjedhore. Pasi është konstatuar ky gabim njerëzor janë marrë masat për heqjen e postimeve të karakterit elektoral.

Më datë 11.02.2025, ora 15:00, u zhvillua seanca publike për këtë shqyrtim administrativ. Në këtë seancë ishin përfaqësuesi i Organizatës Qendra “Qëndresa Qytetare” z. Dhimitër Zguro, Drejtori i Njësisë Vendore të Kujdesit Shëndetësor Kolonjë, Drejtori i Shërbimit Spitalor Tepelenë si dhe Drejtori i Njësisë Vendore e Kujdesit Shëndetësor Durrës.

Nga vlerësim të pretendimeve të palëve, fakteve dhe provave të administruara në këtë shqyrtim administrativ çmohet se kërkimi sipas objektit i Organizatës Qendra “Qëndresa Qytetare” është i mbështetur në ligj, përkatësisht në nenin 91, pika, 1 të Kodit Zgjedhor, *“Me përjashtim të rasteve të parashikuara me ligj, nuk mund të përdoren ose të vihen në mbështetje të kandidatëve, të partive politike ose të koalicioneve në zgjedhje burime të organeve apo enteve publike në nivel qendror ose vendor, apo çdo lloj enti tjetër ku shteti zotëron kapitale apo kuota ose/dhe emëron shumicën e organit mbikëqyrës apo organit administruar të entit, pavarësisht nga burimi i kapitalit ose pronësia”.* Po ky nen parashikon se **“burime”** quhen asetet e luajtshme dhe të paluajtshme, të parashikuara në nenin 142 të Kodit Civil, si dhe çdo burim njerëzor i institucionit”.

Nga hetimi administrativ u provua se postimet, ripostimet dhe pëlqimet janë bërë në faqet zyrtare të rrjetit social “Facebook” të institucioneve subjekt i këtij denoncimi.

Pas verifikimeve të kryera nga ana jonë, u konstatua se postimet, ripostimet dhe pëlqimet, me karakter politik janë fshirë nga rrjeti social i Institucionit.

Sa më sipër, vlerësoj se duhet të pushohet hetimi, duke i'u tërhequr vëmendje Drejtuesve të Institucioneve Publike që të tregojnë kujdes të shtuar në publikimin e postimeve apo ripostimeve të ndryshme me përmbajtje politike apo elektorale, duke mos lejuar shpërndarjen dhe ripostimin e veprimtarive politike apo elektorale të Institucioneve të tyre eprore, pasi përbën shkelje të dispozitave ligjore të Kodit Zgjedhor dhe vendimit nr. 9, datë 24.12.2020, të Komisionit Rregullator, të ndryshuar.

PËR KËTO ARSYE:

Bazuar në nenin 19, pika 1, shkronjat “dh”, “f ” dhe “n”, pika 2, nenin 91 të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar, vendimin nr. 9, datë 9.3.2021, dhe vendimin nr. 9, datë 24.12.2020, të Komisionit Rregullator, të ndryshuar,

V E N D O S:

1. Pushimin e shqyrtimit administrativ të denoncimit nr. 3, datë 03.02.2025, të Organizatës Qendra “Qëndresa Qytetare”, ndaj:
 - Drejtorit të Shërbimit Spitalor, Tepelenë;
 - Drejtorit të Njësisë Vendore të Kujdesit Shëndetësor, Kolonjë;
 - Drejtorit të Njësisë Vendore të Kujdesit Shëndetësor, Durrës;
 - Drejtorit të Spitalit Bashkiak Tropojë;
 - Drejtorit të Spitalit Bashkiak Delvinë;
 - Drejtorit të Spitalit Bashkiak Pukë;
 - Drejtorit të Spitalit Bashkiak Kolonjë;
 - Drejtorit të Qendrës Shëndetësore Paskuqan;
 - Drejtorit të Qendrës Shëndetësore Bregu Lumit.
 - Partisë Socialiste të Shqipërisë.
2. Rezultatet e këtij vendimi i njoftohen palëve nëpërmjet adresës së postës elektronike.
3. Ky vendim hyn në fuqi menjëherë dhe publikohet në faqen zyrtare të internetit të Komisionit Qendror të Zgjedhjeve.
4. Kundër këtij vendimi mund të bëhet ankim në Komisionin e Ankimimeve dhe Sanksioneve brenda 3 (tre) ditëve nga shpallja e tij.

Komisioneri Shtetëror i Zgjedhjeve

Illirjan CELIBASHI